

欽定唐書

卷二百
列傳六下

唐書卷二百十六下

唐 端 明 殿 學 士 宋 祁 撰

列傳第一百四十一下

吐蕃

永泰大歷間再遣使者來聘於是戶部尚書薛景仙往報詔宰相與吐蕃使者盟俄寇靈州掠宜祿郭子儀精甲三萬戍涇陽入屯奉天靈州兵破虜二萬上級五百首景仙與論泣陵偕來請境鳳林關而路悉等十五人又來三年虜引衆十萬復攻靈州略邠州先是尚悉結自寶應後數入邊以功高請老而贊磨岱之爲東面節

度使專河隴邠寧馬璘朔方將白元光再破其衆獲馬
羊數千劔南亦破虜萬人尚悉摩復來朝天子以虜數
入塞詔治守障徙當悉柘靜恭五州皆據險以守八年
虜六萬騎侵靈州敗民稼進寇涇邠渾瑊與戰不利副
將死略數千戶瑊整卒夜襲其營涇原馬璘以兵掩之
潘原射豹皮將死軍中哭乃遁去璘收所俘士及男女
而還郭子儀又破其衆十萬九年帝遣諫議大夫吳損
脩好虜亦使使者入朝於是子儀屯邠州李抱玉屯高
壁馬璘屯原州李忠臣屯涇州李忠誠屯鳳翔臧希讓
屯渭北備虜之入明年西川節度使崔寧破虜於西山

虜攻臨涇隴州次普潤焚掠人畜與抱玉戰義寧破之道涇州璘尾追敗之於百里又明年崔寧破虜故洪節度氏蠻黨項等兵斬首萬級禽酋領千人牛羊廩鎧甚衆獻之朝吐蕃不得志入掠黎雅於是劙南兵合南詔與戰破之禽大籠官論器然又侵坊州取黨項牧馬崔寧攻望漢城破之山南西道節度使張獻恭戰岷州吐蕃走寧破西山三路及印南兵斬首八千級十三年虜大會馬重英以四萬騎寇靈州塞漢御史尚書三渠以擾屯田爲朔方留後常謙光所逐重英殘鹽慶而去乃南合南詔衆二十萬攻茂州略扶文遂侵黎雅時天子

已發幽州兵馳拒虜大奔破初虜使數至留不遣所俘虜口悉部送江南德宗卽位先內靖方鎮顧歲與虜確其亡獲相償欲以德綏懷之遣太常少卿韋倫持節歸其俘五百厚給衣褚切敕邊吏護亭障無輒侵虜地吐蕃始聞未信使者入境乃皆感畏是時乞立贊爲贊普姓戶盧提兵曰我乃有三恨不知天子喪不及弔一也山陵不及賻二也不知舅卽位而發兵攻靈州入扶文侵灌口三也卽發使者隨倫入朝帝又遣倫還蜀俘虜以倫再至歡甚授館作聲樂九日留以論欽明思等五十人從獻方物明年殿中少監崔漢衡往使贊普猥曰

我與唐舅甥國詔書乃用臣禮卑我又請雲州西盡賀蘭山爲吐蕃境邀漢衡奏天子乃遣入蕃使判官常魯與論悉諾羅入朝道贊普語且引景龍詔書曰唐使至甥先與盟蕃使至舅亦將親盟贊普曰其禮本均帝許之以獻爲進賜爲寄領取爲領之以前宰相楊炎不通故事爲解并約地於賀蘭其大相尚悉結嗜殺人以劍南之敗未報不助和議次相尚結贊有謀固請休息邊人贊普卒用結贊爲大相乃講好漢衡與其使區頗贊偕來約盟境上拜漢衡鴻臚卿以都官員外郎樊澤爲計會使與結贊約且告龐右節度使張鎰同盟澤與結

贊約盟清水以牛馬爲牲鑑欲末其禮乃紿結贊曰唐
非牛不田蕃非馬不戰請用犬豕羊結贊聽諾將盟乃
除地爲壇約二國各以二千士列壇外冗從立壇下鑑
與幕府齊眡齊抗鴻臚漢衡計會使于頓及澤魯皆朝
服結贊與論悉頰藏論臧熱論利陀論力徐等對升壇
刑牲壇北雜其血以進約唐地涇州右盡彈箏峽隴州
右極清水鳳州西盡同谷劒南盡西山大度水吐蕃守
鎮蘭渭原會西臨洮東成州抵劒南西磨些諸蠻大度
水之西南盡大河北自新泉軍抵大磧南極賀蘭橐它
嶺其間爲閑田二國所棄戍地母增兵母創城堡母耕

邊田旣盟請鑑詣壇西南隅浮屠幄爲誓於是升壇大
享獻酬乃還帝命宰相尚書與虜使者盟長安而清水
之約疆場不定復令漢衡決於贊普乃克盟於是宰相
李忠臣盧杞關播崔寧工部尚書喬琳御史大夫于頤
太府卿張獻恭司農卿段秀實少府監李昌夔京兆尹
王翊金吾衛大將軍渾瑊與區賴贊等同盟京城之右
郊禮如清水前二月告廟齊三日關播跪讀載書已盟
乃大享詔左僕射李揆爲入蕃會盟使還區賴贊等朱
泚之亂吐蕃請助討賊詔右散騎常侍于頤持節慰撫
太常少卿沈房爲安西北廷宣慰使以報之渾瑊用論

莽羅兵破泚將韓旻於武亭川初與虜約得長安以涇靈四州畀之會大疫虜輒引去及泚平責先約求地天子薄其勞第賜詔書償結贊莽羅等帛萬匹於是虜以爲怨貞元二年詔倉部郎中趙建往使而虜已犯涇隴邠寧掠人畜敗田稼內州皆閉壁游騎至好畤左金吾將軍張獻甫神策將李昇曇等屯咸陽河中渾瑊華州駱元光援之以左監門將軍康成使焉尚結贊屯上砦原亦令使論乞陀來請盟鳳翔李晟遣部將王佖以銳兵三千夜入汧陽明日薄其中軍虜驚潰走結贊僅自脫虜衆二萬侵鳳翔李晟擊却之因襲破摧沙堡燒儲

詹斬守者吐蕃攻鹽夏刺史杜彥光拓拔乾暉不能守悉其衆南奔虜遂有其地天子以邊人殘沒下詔避正殿痛自咎詔駱元光經略鹽夏三年命左庶子崔灝李銛踵使結贊得鹽夏皆戍以兵乃自屯鳴沙然饋餉數困於是駱元光韓游瓌濱塞而屯馬燧次石州跨河相掎角結贊大懼屢請盟天子不許卽以貴將論頴熟厚賂乞和於燧燧以爲情身入見天子諸將以燧入皆守壁不戰結贊遽還走馬多死士不能步有饑色潰始至鳴沙傳詔讓結贊破約陷鹽夏對曰本以武亭功未償乃來又候碑仆疆場不明故行境上涇州乘城自保鳳

翔李令不納吾使雖康成等來皆不能致委曲我日望大臣而卒無至者我故引還鹽夏守將懼吾衆以城丐我非我敢攻也若天子復許盟虜之願也唯所命當以鹽夏還唐又言清水盟大臣少故約易壞請悉遣宰相元帥二十一人會盟并言靈鹽節度使杜希全涇原節度使李觀外蕃所信請主盟帝復使澣報結贊曰希全守靈州有分地不可以越境觀旣徙官以渾瑊爲盟會使約五月盟清水使先效二州以驗虜信結贊辭清水非吉地請會原州之土梨樹乃歸二州天子從之瑊來受命拜漢衡兵部尚書以副瑊瑊率師二萬待期詔駱

元光助之宰相議所盟地左神策將馬有鄰建言土黎
樹林薈巖阻兵易詭伏不如平涼夷漫坦直且近涇緩
急可保也乃定盟平涼城約結贊主客均以兵三千至
壇外誕從四百叩壇以游軍交邏相入將盟結贊伏精
騎三萬于西縱邏騎出入城軍城將梁奉貞亦駿馬入
虜軍營陰執之而城不知也客請城等具冠劍皆就幄
更衣從容畔肆虜忽三伐鼓衆譟而興城不知所出走
幄後得馬不銜而馳十里始得銜虜追矢若雨不傷也
至元光營乃脫裨將辛榮兵數百據北阜與虜戰矢盡
乃降判官韓弁監軍宋鳳朝死之漢衡與判官鄭叔矩

路泌掌書記袁同直列將扶餘準馬寧孟日華李至言
樂演明范澄馬弇中人劉延邕俱文珍李朝清等六十
人皆被執士死者五百生獲者千餘人漢衡語虜曰我
崔尚書也結贊與我善若殺我結贊亦殺若乃不死人
負一木以繩三約之係其髮驅之夜則杙地繫而仆蒙
以羈守者寢其上始結贊將劫希全觀急以銳兵直趣
京師旣不克又欲禽臧等擣虛入寇其謀本然旣引去
至故原州坐帳中見漢衡等慢言渾臧戰武功我力也
許裂地償我而自食其言吾旣作金枷將必得臧以見
贊普乃今失之徒致公等無益也當使人歸報初漢衡

遇亂從史呂溫身蔽兵溫傷而漢衡脫虜人嘉其義厚
給養之結贊屯石門以俱文珍馬寧馬弁歸唐而囚漢
衡叔矩河州辛榮廓州扶餘準鄯州帝猶使中人齎詔
書賜結贊拒不受虜戍鹽夏涉春疫大興皆思歸結贊
以騎三千迎之火二州廬舍頽郭堞而去杜希全分兵
保之帝哀漢衡等陷辱下詔賜其子七品官叔矩泌弁
日華榮志信澄良賁演明一子八品官袁同直而下一
子九品官以決勝軍使唐良臣屯潘原神策將蘇太平
屯隴州結贊召漢衡日華延邕至石門以五騎送境上
遣使者奉表來李觀曰有詔不內吐蕃使者受漢衡等

放其使結贊以羌渾衆屯潘口傍青石嶺三分其兵趨
隴汧陽間連營數十里中軍距鳳翔一舍詭漢服號邢
君牙兵入吳山寶鷄焚聚落略畜牧丁壯殺老孺斷手
剔目乃去李晟嘗歷大木塞安化隘處虜過悉焚之詔
神策將石季章壁武功良臣移師百里城虜又剽汧陽
華亭男女萬人以畀羌渾將出塞令東向辭國衆慟哭
投塹谷死者千數吐蕃又入豐義圍華亭絕汲道守將
王仙鶴請救於隴州刺史蘇清汚合太平兵赴之虜逆
戰太平不勝引還虜日干騎四掠隴兵不敢出虜積薪
將焚華亭仙鶴以衆降清汚潛兵大象龕夜半約城中

舉火燭天虜衆驚因襲其營乃去更攻連雲堡飛石投
市井皆滿爲虛梁絕塹而升守將張明遠降于虜虜分
捕山間亡人及牛羊率萬計涇隴邠之民蕩然盡矣諸
將曾不能得一俘但賀賊出塞而已連雲堡涇要地也
三垂峭絕北據高虜所進退候火易通旣失之城下卽
虜境每覈稼必陳兵于野故多失時是歲三州不宿麥
虜數千騎犯長武城城使韓全義拒之韓游瓌兵不出
於是虜安行邠涇間諸屯西門皆閉虜治故原州保之
帝取所獲吐蕃生口不二百徇諸市以安京師四年五
月虜三萬騎略涇邠寧慶鄜五州之鄙焚吏舍民闔係

執數萬韓全義以陳許兵戰長武無功初吐蕃盜塞畏
春夏疾疫常以盛秋及是得唐俘多厚給產質其孥故
盛夏入邊尚悉董星論莽羅等又寇寧州張獻甫拒斬
裁百級轉剽鄜坊乃去五年韋臯以劒南兵戰臺登殺
虜將乞臧遮遮悉多揚朱西南少安不三年盡得嶲州
地久之北廷沙陀別部叛吐蕃因是陷北廷都護府安
西道絕獨西州人尚爲唐守八年寇靈州陷水口塞營
田渠發河東振武兵合神策軍擊之虜引還又寇涇州
掠田軍千人守捉使唐朝臣戰不利山南西道節度使
嚴震破虜于芳州取黑水壁焚積聚自虜得鹽州塞防